

Onnern Länner, onnern Sitte

Om letzte Somsdaach war ich beim Schorsch unn habb merr dem soi Bits gebumbt. Weil ich wollt unsern Tooster uffschrauwe unn gucke, warum der nix mehr mächt, seh awwer, dass merr doodeferr enn Schrauwezieher mettem kloone Fünfkont brauche det, wassen Bleedsinn. So ooner habb ich nit, awwer de Schorsch hott alles, also aach so Stifte, die merr Bits nenne dut unn die merr in so enn extra Bitshalter enoistecke kann.

Als merr dann beim Schorsch im Keller warn, hotter erst geguckt, obs Kättche aach nit in de Näh iss unn hott merr dann was erzählt. Dess war so schee, dass ich jetzt de Schorsch redde loss: „Mir hawwe e nei Nochbern, die hott seit e paar Woche newedroo die Wohnung im Parderr, e nett Fraasche ohne Monn. Die hott heit moin ihr Gass gekehrt, als ich grad die Zeidung holle wollt. Ich guck unn denk, dess musse nit mache, bin bei se gonge unn habb gesacht: Lieb Fraa, Sie hawwe bald zwaa Meter von moine Gass mettgekehrt, dess iss nit notwenndisch, dess mach ich selber.

Doo stitzt sich die Fraa uff ihrn Besem. Herr Nachbar, dort wo ich herkomme wird das so gemacht. Ich komme aus Norddeutschland, da ist mehr Wind als hier, und Bäume und Herbst haben wir auch. Wenn ich also die Blätter vom Nachbargrundstück ein Stück weit wegmache, so ist das kein guter Wille, sondern Voraussicht. Denn sonst werden sie mit dem nächsten Wind zu mir geblasen - und dann? Sehen Sie, deshalb kehrt man bei uns nicht nur vor seiner Tür.

Während ich noch iwverleecht habb, ob ich dess beim nächsde Mol nit aach so mache soll, doo sacht die Fraa: Herr Nachbar, könnten Sie mir helfen? Ich will in der Diele eine kleine Garderobe mit einem Spiegel aufhängen, doch ich weiß nicht, ob dort Lichtleitungen oder Heizungsrohre verlaufen. Sie haben doch sicher ein Gerät, mit dem man das feststellen kann, oder?

Ich nick unn saach: Awwer klar habb ich so e Gerät, so enn Piepser.

Doo guckt die Fraa mich gonz lieb oo. Könnten Sie nachher zu mir kommen und das ausmessen?

Weils Kättche vom Fensder aus uns zugeguckt hott saach ich: Ich glaab awwer nit, dass dess Ding noch funktioniert.

Unn richdisch: Als ichs beim Friehtick dem Kättche erzählt habb, kreischt die: Zu der gehsde merr nit eniwwer, merr waaß was die ausgemesse hawwe will. Waach dich, sunnst gibts was mettem Welscherholz.

Ich denk, die Fraa newedroo det dess Ding Nudelholz nenne, zum Kättche awwer saach ich: Jetzt waaß ich aach, warum die Eskimos koo Welscherholz hawwe. Weil die Eskimos nit eifersüchdich sinn, im Geechedeil. Wenn doo enn fremde Jäscher in de Iglu kimmt, hält die Hausfraa den Fremde iwverall warm, vor allem dort, wos dem om meisde kalt iss. Unn dere Fraa ihrn Monn sitzt debei unn lacht. Die doo owwe sinn nit so eifersüchdich wie mir, die brauche koo Welscherholz.

Dess Kättche guckt mich von de Seit her oo. Dess hosde dir doch ausgedenkt, du Spinner. Was sollen die Eskimos aach mettem Welscherholz? Die esse doch nor Fleisch von de Walrösser unn so.

Ich habb nor gegrinst unn gemoont: Onnern Länner, onnern Sitte, vor allem owwe im Norde. Awwer ich geh wenichsdens zur Nochbern unn sach, dass ich ihr nit helfe kann. Weil mein Piepser gieht schunn long nimmi.“

Eiern Honnes